



**IZVJEŠTAJ**  
**SA 8.SASTANKA PREDSJEDNIKA PARLAMENTATA**  
**ZEMALJA ČLANICA JADRANSKO-JONSKE INICIJATIVE**

Bari, 28. i 29. april 2010.

U Bariju je, 28. i 29. 4. 2010., održan 8. sastanak predsjednika parlamenta zemalja članica Jadransko-jonske inicijative na kojem su učestvovali predsjednici i zamjenici predsjednika nacionalnih parlamenta: Albanije, Bosne i Hercegovine, Crne Gore, Grčke, Hrvatske, Italije, Srbije i Slovenije.

Na ovom sastanku Parlamentarnu skupštinu BiH predstavljala je gđa **Dušanka Majkić**, zamjenica predsjedavajućeg Doma naroda.

Konferencija je počela uvodnim obraćanjem gops. **Gianfranca Finija**, predsjedavajućeg Predstavničkog doma Parlamenta Italije, koji je govorio o značaju Jadransko-jonske inicijative i aktivnostima koje se danas preduzimaju u okviru saradnje s drugim organizacijama, inicijativama i institucijama EU. On je istakao potrebu zajedničkog pravnog okvira za zemlje članice koji bi omogućio razvoj projekata s obje strane mora, posebno naglasivši projekat makroekonomske regije.

O intenziviranju saradnje između zemalja članica JJI govorila je i gđa **Emma Bonino**, potpredsjednica Senata Italije, posebno naglasivši potrebu saradnje u oblasti energije i turizma.

Gosp. **Alfred Mantica**, državni podsekretar za vanjske poslove Italije, istakao je značaj vizne liberalizacije za zemlje Zapadnog Balkana i potrebu da se Bosna i Hercegovina i Albanija što hitnije priključe zemljama u kojima je ovaj proces već završen.

Govoreći o promjenama u Evropi, on je naglasio da Italija pruža snažnu podršku zemljama Zapadnog Balkana na putu ka članstvu u EU, istakavši da, za Italiju, ove zemlje već predstavljaju Evropu. On je rekao da je neophodno unutar JJI jačati veze sa zemljama koje su već članice EU, te da ova inicijativa ima podršku svih zemalja EU.

Ambasador **Alessandro Grafini**, generalni sekretar Jadransko-jonske inicijative, govorio je o periodu stagnacije te inicijative, kad se javilo i pitanje organiziranja radnih tijela, nakon čega je formiran stalni sekretarijat. On je objasnio način rada, organizaciju i ciljeve JJI.

Kao jedan od najvažnijih u ovom trenutku, on je istakao doprinos integraciji Zapadnog Balkana u Evropsku uniju.

**Prva sesija odnosila se na ulogu parlamentarne saradnje unutar Jadransko-jonske inicijative s ciljem jačanja evropskih integracija zemalja Zapadnog Balkana.**

U uvodnom izlaganju gosp. **Luka Bebić**, predsjednik Hrvatskog sabora, naglasio je da Hrvatska snažno podržava napore EU u izgradnji regionalnog razvoja kao i napore zemalja Jugoistočne Evrope koje još nisu stekle kandidatski status, da postanu punopravne članice Evropske unije.

Trend afirmiranja regionalne saradnje je dodatni impuls zemljama Jugoistočne Evrope da intenziviraju međusobnu komunikaciju i kroz nju se pozicioniraju kao bitni subjekti međunarodne politike, uz odgovornost učvršćivanja regionalne stabilnosti, političkih, privrednih i sigurnosnih kapaciteta te općeg unapređenja dobrosusjedskih odnosa.

Budući da je usklađivanje zakonodavstva jedan od bitnih preduslova za ulazak u Evropsku uniju, on je istakao značaj uspostavljanja kompatibilnosti pravnih propisa različitih država u čemu parlamenti imaju važnu ulogu. Za izgradnju evropskog područja saradnje potrebno je razvijanje zakonodavstva kao glavne pretpostavke za očuvanje sigurnosti u jadransko-jonskom regionu, zaštita okoliša, kulturne baštine i općenito morskih dobara u svim oblicima. Na kraju izlaganja Bebić je zamolio države članice EU da ohrabruju Evropsku komisiju da još više participira u finansiranju konkretnih projekata JJI namijenjenen borbi protiv svih oblika ilegalne trgovine i što skorijeg integriranja cijelog jugoistoka Evrope u Evropsku uniju.

Nakon uvodnog izlaganja gosp. Bebića, uslijedila je debata tokom koje su izlaganja imali predstavnici ostalih zemalja učesnica skupa.

Gđa **Duška Majkić**, zamjenica predsjedavajućeg Doma naroda PSBiH, istakla je da Bosna i Hercegovina ima velika očekivanja od zemalja učesnica JJI, posebno unutar parlamentarne dimenzije, kroz razmjenu iskustava i znanja, definiranje zajedničkih interesa te intenziviranja saradnje sa EU i drugim regionalnim inicijativama.

BiH očekuje da će ovakav vid saradnje doprinijeti jačanju mira i sigurnosti te učvršćivanju regionalne stabilnosti.

Govoreći o situaciji u našoj zemlji, gđa Majkić istakla je da je BiH ispunila sve uslove za liberalizaciju viznog režima. Ona je istakla kako smo očekivali da ćemo dobiti bezvizni režim odmah nakon ispinjavanja sva 174 uslova, ali da nije bilo tako, te da BiH ne traži ništa što joj ne pripada ali da traži ono što je zaslužila ispunjavanjem postavljenih uslova.

Gđa Majkić izrazila je očekivanje da će parlamenti zemlja članica JJI pomoći i podržati BiH u dobivanju bezviznog režima što prije. Ona je istakla da je Zapadni Balkan vezan mnogim historijskim vezama, ali da neće biti miran i siguran dok se sve zemlje ne pridruže porodici evropskih naroda.

On je na kraju izrazila nadu da će kolege iz parlamenta zemalja članica JJI pomoći BiH ali i ostalim zemljama u regionu na putu ka evropskim integracijama.

Gosp. **Tilemachos Chytiris**, predsjedavajući Grupe prijateljstva Parlamenta Grčke za saradnju s Italijom, naveo je 2014. godinu kao realan datum kada će EU biti spremna da primi zemlje Zapadnog Balkana. On je istakao da Grčka snažno podržava proces integriranja ovih zemalja, dodavši da najveći napor treba da ulože same zemlje kandidatkinje jer se uslovi

EU nikada ne mijenjaju. On je sugerirao da parlamenti treba da imaju ključnu ulogu u približavanju zemalja Jugoistočne Evrope EU kroz prevladavanje zakonskih prepreka.

Gosp. **Ranko Krivokapić**, predsjednik Skupštine Crne Gore, rekao je da regionalne organizacije, u smislu integriranja svih evropskih regija sa svojim specifičnostima, treba da se vrednuju kao neodvojivi dio napora ovih zemalja na putu ka EU.

On je istakao da je potrebno uvođenje principa „regionalne odgovornosti” kao garancije uspjeha.

Govoreći o evropskim integracijama, Krivokapić je naglasio značaj Lisabonskog ugovora koji je stvorio preduslove za proširenje EU.

Tim ugovorom je, također, povećan značaj i nacionalnih parlamenata i Evropskog parlamenta. U tom smislu, neophodno je usklađivanje zakonodavstva i jačanje kapaciteta parlamenata zemalja koje su u procesu pristupanja EU ali i njihova međusobna saradnja.

Gosp. **Pavel Gantar**, predsjednik Državnog zbora Republike Slovenije, istakao je da se veliki entuzijazam, odlučnost i očekivanja zemalja Zapadnog Balkana da zakorače u bolji život nakon svega što se na tim prostorima dešavalo ne smiju biti ni na koji način iznevjerena.

On je upozorio da pojedina mišljenja koja se mogu čuti o krizi EU i potrebi da se proces proširenja zaustavi nisu službeni stavovi nijedne zemlje ni institucije EU, te da to ne smije obeshrabiliti ove zemlje.

On smatra da bi odgađanje prijema ovih zemalja u evropsku porodicu moglo da im oduzme nadu i probudi stare strahove, te da je to poruka koja se mora snažno poslati sa skupa u Bariju.

### **Tema druge sesije bilo je očuvanje i unapređenje Jadranskog mora kao faktora za razvoj kulture i turizma u regionu.**

U svom uvodnom izlaganju, gosp. **Antonio Leone**, potpredsjednik Predstavničkog doma Parlamenta Italije, govorio je o riziku od zagađenja Jadransko-jonske regije, istakavši zajednički interes zemalja u prekograničnoj saradnji kao preduslov za efikasnu zaštitu okoliša i promociju turizma.

Gosp. **Luka Bebić** podsjetio je na specifičnost Jadransko-jonske regije, kao prostora na kojem se prepliću četiri velike religije i kulture i koja predstavlja kolijevku civilizacije. Govoreći o bogatstvu Mediterana, on je istakao da su osnovni preduslovi za razvoj turizma u ovom trenutku: mir, sigurnost, odsustvo opasnosti od terorističkih napada, uz snažnu saradnju zemalja Jadransko-jonske regije.

On je kao bitne faktore za razvoj turizma izdvojio i čuvanje biološke ravnoteže mora, podvodna istraživanja i pitanje energetske potencijala ovih zemalja

Bebić je naglasio potrebu osiguravanja obnovljivih izvora energije, kao osnove za razvoj privrede i ekonomije, te da će se u budućnosti razgovarati i o povezivanju energetskih sistema. Budući da u Jadransko-jonskom bazenu živi oko 100 miliona ljudi, on predstavlja značajnu subregiju u Evropi.

Gosp. **Tilemachos Chytiris** naveo je da je ekonomska kriza znatno uticala na turizam na jadransko-jonskoj obali i da se sada suočavamo s posljedicama koje zahtijevaju hitne mjere.

On smatra da će budućnost turizma zavisiti od zaštite okoliša, očuvanja kulture i razvoja infrastrukture.

U narednim godinama turizam će se sve više razvijati u novim pravcima. Osim uobičajenog morskog i planinskog, pažnju treba posvetiti i alternativnom, tradicionalnom, vjerskom turizmu, kako bi se ta grana razvila kao trajna kategorija.

Gosp. **Ranko Krivokapić** govorio je o značaju kulture za razvoj turizma.

Gosp. **Pavel Gantar** istakao je potrebu praćenja svjetskih trendova kroz razvoj turizma i u unutrašnjosti zemalja, za razliku od dosadašnjih aktivnosti koje su podrazumijevale razvoj turizma samo na obalama mora.

Na kraju konferencije usvojena je Deklaracija iz Barija, s dva uložena amandmana. Tekst usvojenog amandmana, a čiji je predlagatelj Dušanka Majkić, glasi: „Pozdravljamo napore koje je Bosna i Hercegovina učinila na ispunjavanju svih uslova za liberalizaciju viznog režima i očekujemo da Bosna i Hercegovina dobije bezvizni režim što je prije moguće”.

U narednih godinu dana predsjedavanje Jadransko-jonskom inicijativom preuzima Crna Gora.

Pripremila:

Jelena Rajaković  
Šef Odjela za bilateralne odnose  
i protokol PSBiH

Odobrila:

Dušanka Majkić  
Zamjenik predsjedavajućeg  
Doma naroda PSBiH

Prilog:

- Program Konferencije
- Deklaracija
- Lista učesnika

Dostaviti:

- Kolegiju Predstavničkog doma
- Kolegiju Doma naroda
- Komisiji za vanjske poslove Predstavničkog doma
- Komisiji sa vanjske i trgovinsku politiku Doma naroda
- Zajedničkoj komisiji za evropske integracije